



TALOFA LAVA!

E muamua ona faatalofa atu i le mamalu o le Ekalesia ua potopoto mai e molimauina le Faamanuia a le Kolisi i lenei tausaga 2009. Ou te faatalofa atu i le Taitaifono o le EFKS faapea le Laulau a le Fono Tele, i le Sui Taitaifono, o le Failautusi Aoao ma le Teutupe, o le Taitaifono o le Komiti a le Au Toeaina ma le Failautusi faapea le Komiti a le Au Toeaina, o Komiti taitasi a le Ekalesia, aemaise le aoao o le Ekalesia i Faafeagaiga faapea matua ma aiga, o uo ma aumeamamae a lenei Kolisi, ua molimauina lenei aso fiafia o le Vasega Faaiuso. Tau ina ia viia pea le alofa ma le agalelei o lo tatou Atua ona o ana faamanuiaga ua mafai ona molimauina i lenei tausaga atoa. Ou te talitonu o lau tapuaiga ma la outou tatalo, ua sao ma manuia ai fuafuaga uma a le Kolisi i lenei tausaga.

E muamua ona ave le faamalo i aoao ma faletua faaiuso o lenei tausaga, ona ua a'e malo lo outou faamoemoe e pei ona aotauina ai



Polofesa Otele Perelini
Pule o le Kolisi

i lenei fa tausaga i Malua. Faamalo le tauivi, faamalo le onosai, faamalo le galulue! O lenei ua tau lau o le faamoemoe sa nofo tapuai ai lau Ekalesia aemaise outou matua ma aiga. Tatou ave la le mua ma le viiga i le Atua, aua o la ua na faia mea silisili tatou te olioli ma fiafia i ai. E le faagaloina la outou Vasega i totonu o lenei aai, aemaise ai i la

outou tautua ma mea lelei e tele sa outou faia aua le manuia o le Kolisi e pele i o tatou loto. Tau ina ia alofa pea le Atua i lo outou taapeape atu i nuu, aiga, ma le Ekalesia, ma ia saga faamanuia pea e le Atua fuafuaga uma mo le lumanai.

E momoli atu foi faamanuiaga mo lau Susuga i le faiaoga Makes ma le faletua ia Torise ma le fanau, e tusa ai ma le faamoemoe mo le toe faalauteleina aua le Ekalesia ma lana Kolisi Faafaifeau i le lumanai. O le tatalo, ia alofagia e le Atua le faamoemoe ma ia manuia le aumau ai i Melepone i tausaga o le a nofo aooga ai.

Tau ina maua pea e i tatou uma se Kerisimasi fiafia ma le Tausaga Fou ua tumu i faamanuiaga a le Atua.

Soifua,

Otele Sili Perelini
Pule o le Kolisi

SILASILA I TOTONU

Talofa Lava! - Polofesa Otele Perelini	1	Malua Internet Cybercafe / Aoga Tusi Paia Malua	11
TSUNAMI	2 - 5	Mafutaga Faafoiina 2009 / Aoga Aso Sa	12
Fonotaga a le FGFL / Talimalo Malua i le Fonotaga a le FGFL	6 - 7	Mafutaga Aoao ma Faletua	13
Face to Face INITIA 2009	7	Malua Kindy / Autalavou Laiti	14 - 15
IA MOTU LE PA A UA ILOA	8 - 9	Taaloga Faletua Malua	15
Sui-Pule Fou a le Kolisi / South Seas Christian Ministry	10	Pa Povi / Taaloga a Aoao	16

TSUNAMI

SUIA E LE GALULOLO POLOKALAME MASANI A LE KOLISI

O foliga o le taeao o le aso Lua, 29 o Setema 2009, e pei lava o taeao masani lava i totonu o le Kolisi ma ana polokalame faasolo ma le sauniuni atu mo tapuaiga taeao (morning devotion) i le itula e valu. Peitai, pe a ma le toe kuata i le fitu i lea lava taeao, na faalogoina ai se mafuie tele. E uiga ese lea mafuie ona o le malosi faapea le umi o le taimi sa luluina ai ma ua faatoa faalogo lea i se mafuie faapea i Samoa.

Sa faalogoina le fetagisi o fanau laiti, a'o le au matutua ua taufetuli solo e agai i fale e siaki tamaiti ma meatotino. Ua autilotilo ma talatalanoa i aiga tuaoi i le malosi o le mafuie ae vaaia loa le taamilo mai o le sa o le Alii Pule ma tuu valaau i tagata e agai i uta i fanua maualuluga. Ua amata ona gaoioi tagata i le tapenaina o tamaiti ma fanau laiti, o ofu, lavalava ma vai taumafa ma gasolo loa i uta i le pa povi.

Ua ti le leitio ua faaleotele ona o le fia maua o ni faamatalaga i le mea ua tupu ma maua ai loa faasilasilaga o le mafuie, faapea lapataiga mo se tsunami e ono tulai mai. Pe a ma le lima i le sefulu minute, ae faalogoina loa sailini o taavale a leoleo ma ua poloaiga faamallosia tagata uma e agai i uta i nofoaga maualuluga, ma ua toatele foi le Kolisi ua usitaia le saunoaga a le Alii Pule faapea ma faasilasilaga a alii malu o le malo. O nisi o faiaoga ma faaiuso ua taamilo i le nuu e lapatai tagata uma ma fesoasoani i aiga o loo i ai tamaiti laiti. E le gata i lea o le tutuli i uta o nisi o aoao ua agai i le malae



Agai atu le Kolisi i le Pa Povi

taalo ma autilotilo i le sami, ua pei se mea matamata.

Ua faigata foi ona maua ni fesootaiga ma aiga ona ua pisi laina telefoni. Pau faamatalaga ua maua e mai le leitio i ripoti mai nuu eseese ma ua iloa ai, ua aafia le atu Aleipata, Falealii, Safata, Manono-tai ma nisi o nuu o Savaii i se galulolo uiga ese, ua faatamaia ai meatotino, aemaise soifua ua maumau.

E fai lava sina mamao i uta i le

tuaoi ma le atinae a le Ekalesia Aoao ua faamautu ai le nuu. Ua nofonofo solo lava aua o loo faamallosia mai pea lapataiga ina ia tumau ai pea i nofoaga maualuluga, seia oo i le taimi e tuuina mai ai le okay ua saogalemu e toe foi i aiga. O fesootaiga foi i telefoni feaveai ua le malolo e le gata mai aiga i Samoa nei ao atunuu i fafo, i le popole mai i alo ma fanau o loo aumau ai i le nei Kolisi.

O nisi o matua ua popole i fanau aoga i Apia ona ua usu le pasi e momoli tamaiti. Ae faafetai i le Atua ona e maua mulimuli mai tala sa alu sao lava le pasi i uta i nofoaga maualuluga ina ua lapatai e alii malu o le malo. Ua atili fiafia matua ina ua toe foi saogalemu mai le pasi, pe a ma se lua itula talu ona maea le mafuie, ma sa faasino e alu sao lava i uta i le pa povi, ua faamautu uma ai le toatele o le nuu.

O le latalata i le itula e sefulu sa tuuina mai ai loa le faatonuga e toe agai i tai ona ua siliga lava se galulolo, aemaise o tamaiti laiti ma pepe fou ua amata ona fetagisi i le vevela ma le fia feinu. Sa agai uma le aoga i le fale-mafutaga ma faia ai loa le lotu faafetai i le Atua ma talosia ai Samoa ma aiga uma ua aafia i lelei faalavelave faalenatura. Sa faapea foi ona faamalolo le Kolisi mai ana polokalame masani, ae agai e tapenapena fale ma vaai fanau iti. O nisi foi sa nonofo lava i uta seia oo i le aoauli o lea lava aso. O se tasi lenei o aso o le a tumau pea i le mafaufau ona o le faalavelave ua tulai mai.

FESOASOANI & FOAI A LE KOLISI MO NUU MAFATIA

Na a'e se tofa i le susuga i le Alii Pule ma le Kolisi Faafaifeau ina ia faamaopopoina se fesoasoani aua nisi o nu'u ma afio'aga sa a'afia i le galulolo i le aso 29 Setema 2009. O le aso Lulu la o le vaiaso lava lea na tupu ai le galulolo lea na finagalo ai loa le Kolisi ina ia fa'amaopopoina loa sana ia lava fesoasoani e molimoli atu i nisi o afio'aga sa fa'atama'ia e le tsunami. O lenei fesoasoani na fa'amaopopoina o

se tamao'aiga tele na aao lava i ai susuga i Faiaoga ma Ali'i A'oa'o o le Kolisi. Na va'aia i lea aso le masa'a mai o le sosia ma le tamao'aiga o lo'o i maota o susuga i Faia'oga aemaise lava i A'oa'o ma o latou faletua. Sa matua felanulanua'i atoa le maota Senetenari na aoina ai lenei foa'i tele i oloa e pei o lavalava i so'o se itu'aiga, o mea taumafa, o pusa apa, o ipu ma le tele lava o mea mo le gasesega o tau-

mafa. Sa matua matauina i lea aso le alofa tula'i o le Kolisi aemaise lava i mea taumafa ma lavalava. Aua sa tu'u lava i le loto fuaia ifo ma le tele e gata mai ai le mafai o le tagata ia ma e le'i i ai fo'i se talitonuga e o'o se taumafaiga vaivai a le Kolisi i le tulaga pei ona sa matauina ai.

Na mae'a le fa'amaopopoina o le

fa'aauau itulau 3



O nisi o Aoa ma Faletua ma le fesoasoani a Malua na sao

mai le itulau 2

fesoasoani a le Kolisi ona i ai lea ma le fuafuaga o le a vaeluaina. O le isi vaega o le fesoasoani e alu i le atu Aleipata, a o le isi vaega o le a te'a atu lea i le atu Falealili. E fa loli tetele na fa'aagaina, e lua loli na o i Aleipata lua fo'i na aga'i atu i Falealili aua le molimoliina atu o lenei fesoasoani i nu'u puapugatia. O faia'oga lava



fa'atasi ai ma nisi o a'oa'o sa auai atu mo le tufatufaina o le fesoasoani alofa a le Kolisi.

Mo le atu Aleipata na mafai ona fa'asopolia Saleaamua, Satitoa, Ulutogia, Mutiatele, Lalomanu, ma Salea-paga i mea taumafa ma lavalava, fa'atasi ai ma le ta'i \$1000.00 tala i nu'u ta'i tasi e pei ona ta'ua. Ma o nu'u pito i mafatia lava ia o le atu Aleipata i le taimi ua mavae le galulolo. Ae mo le atu Falealili na mafai ona o'o atu le

tufa i Poutasi, Vaovai, ma Sa'anapu tai, fa'atasi ai ma le ta'i \$1000.00 i nu'u uma ia.

Na fa'ateia nu'u ta'i tasi i le taunu'u atu o le Kolisi aua o la latou fa'amatalaga o se mea sa le'i mafaufauina. Ae o loimata o le mafatia ma le alofa na feiloa'i ai ma fa'aailoa atu ai fo'i le fa'amoemoe o le o'o atu o le Kolisi se'i fa'aailoa atu fo'i lona alofa mo tagata puapugatia o le atunu'u. Na tali fuaitau mai afioaga uma i le agaga o le fa'afetai ma le fa'agae'etia i le Kolisi ona o lona manatu alofa. Sa fa'apea fo'i ona momoli mai fa'amanuiaga ma mo'o-mo'oga alofa mo le Kolisi ma ona tiute fo'i o lo'o feagai ai. Ona mulia'i lea i le lulu aao ma fa'atofa.

O se tasi lava lea o vaega o le galuega fa'a-faife'au ia le tau lava na o le iloa ma le a'oa'oina o le Tusi Pa'ia i totonu o potu a'oga, a ia iloa fo'i ona fa'atino le alofa ma le fesoasoani i le lalolagi mafatia e pei ona tautala ai le Afioga Pa'ia a le Atua.

E MOMOE MA MANŪ E LE FATI, AE SAU MALA E ATIA'E

Ina ua maea le lotu faafetai ma le lotu e talosia ai tagata ua aafia i le mafuie ma le tsunami a le Kolisi atoa, sa faamalolo loa le aoga e sauniuni ma tapenapena, ona o loo faamallosia pea lapataiga mo nisi galulolo ma o loo faalogoina foi mafuie. E ui ina ua saogalemu mea uma i le Kolisi, a e sa lagona lava le lē mautonu ona ua maua fesoataiga ma nisi o aiga i le atu Aleipata, Falealii ma Safata, ua telē se aafiaga mai le tsunami, faapea tala maua mai ualesi faasalalau ua toetele tagata maliliu ma tagata o loo tausailia pea.

E i ai aoao ma faletua faapea nisi o faiaoga ua aafia aiga i le faalavelave ua tulai mai. Ua atili le popole ona o nisi ua le maua ni fesoataiga, ua na o le fesilisili solo ma le fia o'o i aiga. O le molimau a le Susuga i le faiaoga ia Visiesio Saga i le taunuu atu i lona nuu i le aoauli o le aso lava lea, o se vaaiga uiga ese le tele o taavale a le falemai ma le Koluse mumu ua agai mai i Apia, e aumaia tagata manunua ma e ua maliliu. E fou i le vaai ma e pei o se miti ua lē talitonuina e le mafaufau tulaga ia e vaai atu ai mata, ua peiseai o se vaaiga mai se ata tifaga.



O se vaaiga faanoanoa tele

Ua atili ia lagona o le lē talitonu i le malosi o le tsunami ma mea ua faatamaia ina ua oo i tua. O tagata ua pei e sioa ma feoai solo ua aunoa ma se faamoemoe. E lē mafai e upu ona faamatalaina lagona ma faavasega mea ia e pupula atu ai mata. Ua sola manatu ma ua le iloa po o le a le tala e fai atu i tagata. Ua na o le feofeoai ma autilotilo i tulaga fale ma le mamao o le mea ua ave e le sami tuu ai atigi fale, o mea totino

ua nunumi faatasi ma lapisi, o ogalaau ma isi otaota, o vaa afi ma taavale ua paka mai lalo o laau, o fale o loo tutu pea ua na o poloka sima ua fufulu atoa ma aveesea e le sami meatotino.

Taua e Visiesio, o manatu na muamua oo ane ia te ia, ua uma ona toe suaina e masini tetele ma toe teu tua fale ona ua oo lana vaai

fa'aauau itulau 4

mai le itulau 3

i le isi itu o le nuu sa ola lauusi ai laau. Peitai, o le matautia lea ma le malosi o le galulolo ua faamama ma tafia ai mea uma ma ave faaputu pe a ma le lima selau mita mai le matafaga. E ui lava i le tele o meatotino ua faatamaia e le maemaea o le galulolo, ao le mafatiaga sili ona o ē pele i loto ma agaga, ua motusia faafuasei le mafutaga ona o le maliu ma le oti. E

moni ai le upu: *E momoe ma manū e le fati, ae sau mala e atiae.* O lagona o le faanoanoa ma le mafatia, ona o mea e le i fuafuaina, ua leai ai foi se taimi e faatofa atu ai ia i latou.

E iai itutino o lenei Kolisi, i susuga i aoao, o faletua ma nisi o faiaoga ua motusia le mafutaga ma matua, o matua tausī, o uso, o tuafafine ma nisi o fanau ua maliliu i lenei faalavelave faalenatura. Sa faapea ona faatagaina

i latou uma na aafia aiga e tuua le Kolisi, ina ia mafai ona auai atu i toe sauniga o latou aiga. O le tatalo i le Atua o faamaisega ma faamafanafanaga, ina ia faamaise lona agaga i loto mafatia, faapea foi aiga uma o Samoa ua aafia i lenei faalavelave. Ia loto tetele ma tumau le faatuatua i le Atua, aua o loo soifua pea o la, na te lē tuulafoaina lava i tatou i taimi e fesouaina ai la tatou folauga i le ola nei.

GALUEGA FESOASOANI MO NISI O AULOTU MAFATIA

Mo le silafia malamalama fo'i sa le'i gata ai i tupe ma lavalava ma mea taumafa na molimoliina atu, ae sa fa'apea fo'i ona tula'i le Kolisi ma fa'atino ni galuega alofa mo nisi o afio'aga na tafia e le galulolo. O le aso 7 ma le aso 14 o Novema 2009 na faia ai e le Kolisi ni galuega mo Saleaumua, Satitua, Ulutogia, fa'apea ma Saleapaga. Mo ia aso e lua e usu le galuega pe tusa o le 4.30 i le vaveao ona taunu'u lea i afioaga pe tusa o le ta tonu o le 6 i le taeao lava ona amata lea ona galulue le Kolisi i le taimi lava na taunu'u atu ai.

O le aso 7 Novema 2009 sa galulue ai a'oa'o o le Kolisi i Saleaumua ma Saleapaga. O le fuafuaga fo'i sa faia ia vaeluaina le Kolisi mo galuega i nei afio'aga e lua. O nisi lava ia o nu'u sa matua matauina le fia maua o se fesoasoani e susuga i fa'afeagaiga o lo'o galulue ai i le fa'amamaina o le gasu o lo'o i ai aua ua leai lava nisi e fa'amoemoe i ai susuga i fa'afeagaiga ona ua alu lava le tagata mafatia ia e fai lona fale ma lona aiga i uta. O le mafua'aga lea o le fia mo'omia lava o se fesoasoani aemaise fo'i le tuai ona tapena ese o le gaogaosa sa faia e le tsunami. O lea la ua talafeagai lelei ai lava mana'oga o susuga i fa'afeagaiga o nei afio'aga ma le galuega fesoasoani sa faia e le Kolisi. O le tele lava o galuega o le fa'amamaina o otaota ma ogala'au fa'alalava solo i luga o fanua, aemaise o laupapa ma apa o fale na fa'aleagaina. O galuega fa'apea sa gafa ma a'oa'o na galulue i le maota o le ekalesia i Saleaumua. O le afio'aga o Saleapaga sa fesoasoani i ai le Kolisi i le fa'amamaina o le fanua mo lona maota fou. O le to'atele lava o tagata o lenei ekalesia ua gasolo uma i uta i



E manaomia lava se galuega fesoasoani

le togavao, ma ua i ai fo'i se fuafuaga i le lumana'i o le fausia ai i uta o le malumalu tapua'i o lenei nu'u i se taimi mulimuli ane.

O le aso 14 Novema 2009 na alu ai le lona lua o galuega fesoasoani i ekalesia i Satitua ma Ulutogia. O le ekalesia i Satitua o lo'o galue ai le susuga a Afaese Falana'ipupu ao le susuga ia Mose Lata o lo'o galue i Ulutogia, ma o nisi fo'i nei o ekalesia sa mana'omia se lavea'i. O le ekalesia i Satitua ua gasolo le faife'au ma le to'atele lava o tagata e atia'e i uta. O le isi afa o le Kolisi sa galulue i Satitua mo le fa'amamaina o le nofoaga fou o le faife'au ma lona aiga. A o le isi afa sa galulue i Ulutogia mo le fa'amamaina fo'i o le nofoaga o le malumalu ma le maota o le faife'au ia Mose. Sa fa'aaloalo mai fo'i nei ekalesia uma i le Kolisi e ala i gasegase ma taumafataga ma nisi itu. O

le ekalesia i Saleaumua sa foa'i mai mo le Kolisi taga talo e lua. Ao le ekalesia i Saleapaga sa fa'aaloalo mai i le Kolisi i le povi faatasi ai ma ata o le galuega i Saleapaga lava. Sa matauina lava le fa'amalieina ma le agaga fa'afetai tele o nei ekalesia i galuega fesoasoani a le Kolisi. Sa fa'apena fo'i ona fa'ailoa atu i ai le fa'amoemoe ma le o'o atu o le Kolisi ona o le fia fa'atino lava o le alofa ma galuega lelei i e o lo'o fia maua le fesoasoani.

O le finagalo lava o le Ali'i Pule ma Faiaoga ina ia fa'aauau pea ana galuega alofa i aso o totoo o lenei vaitau a'oga. Ae ona ua utiuti fo'i le taimi ma tele nisi o ana polokalame o le mafua'aga lea ua tasi ai loa se finagalo ina ia fa'agata loa se'ia toe aulia fo'i se isi taimi mulimuli ane pe a finagalo alofa le Matai i le lagi.

AOAOINA LE KOLISI I MALUA I AUALA E FESOASOANI AI IA I LATOU UA AFAINA FAA-LE-MAFAUFAU I LE GALULOLO

O le Aso 20 o Oketopa na faatinoina ai se aoaoga taua mo le Kolisi Faafaifeau e faatatau i auala e fesoasoani ai i mafatiaga faalemafaufau ua afaina ai le toatele o i latou sa afaina i le Galulolo.

O lenei aoaoga sa tapenaina e le faalapopototoga mo sosaiete tumaoti o le SUNGO (Samoa's Umbrella of Non-Government Organisations). Ma sa faapea ona saunoa ai nisi o tagata ua iloga foi lo latou tomiai faapitoa i fesoasoani faalemafaufau mo tagata ua afaina i faalavelave faalenatura.

O lenei aoaoga sa faailoa ai le taua o le fesoasoani faalemafaufau pe a maea se faalavelave matautia. Sa faamanino le taua o fesoasoani faaletino e pei ona faatinoina, e ala lea i vaiinu, meaai, lavalava ma le toe faaleleia o fale ma nofoaga sa faalea-gaina. Peitai, o le afaina o le mafau-fau o le tagata, o se tasi foi lea o vaega sa faamamafa le tataua ona faatauaina. Aua foi a le faaleleia le mafau-fau o le tagata, e ono oo atu ina afaina ai lona tino ma le mafai ai lava ona toe maua le soifua maloloina lelei.

O le molimau a i latou sa faatinoina lenei aoaoga, o le toatele o i latou sa afaina, ua vaaia foliga o le le fiafia ma le le toe fia faia o se mea pe atiae o latou aiga. O nisi na o le nofonofo ma sioa, ao nisi ua le toe fia vaai lava i le sami. O nei aafiaga

(Post Traumatic Stress Disorder) e ono faatuputupulaia ma oo lava ina afaina ai le soifua maloloina o le tagata.

Ao le taua la lea o le fesoasoani faalemafaufau, e mafai ona toe un-aia ai le tagata e ala i le faatala-lanoa (counseling), ina ia mafai ona ia toe iloa le taua o le agai pea i luma ma toe atiae lona olaga. O le faatala-talanoa e mafai ai ona toe iloa e le tagata ua afaina, o lo'o i ai se faamoemoe i luma atu o nei mafatiaga.

Sa tele lava le oa ma le tamaoaiga sa tufaina mai e i latou sa taitaia lenei aoaoga, ao se tasi o aoaoga e le galo, o le vaega mulimuli lea sa faatinoina e se tasi o alii lauiloa mai le Koluse Mumu o William Spears. O lenei alii, ua tele tausaga o galue i nisi o faalavelave matautia i le lalolagi, e pei o le 9/11 i New York ma le Galulolo tele lea na afaina ai Indonesia, Sri Lanka ma nisi atunuu i Asia i le tausaga e 2004.

O le aoaoga a lenei alii e faapitoa lea mo fanau iti ua afaina i faalavelave faalenatura. Ma e maeu foi le tomiai sa tufaina mai. E pei o faatinoga (activities) e mafai ona fai ma tamaiti e aveeseina ai lagona mafatia o loo afaina ai i latou. O le talitonuga o lenei alii, o nei lagona mafatia o loo ulufia i totonu o latou tino. E pei o le fefe, o le faanoanoa, o le ita, o le

popole ma isi. Ma o nei lagona e mafai ona afaina ai e le gata o le mafau-fau, ae mafai foi ona tutupu mai ai ni mai i le tino o le tamaititi. O le auala la e mafai ona aveesea ai nei lagona mafatia, o le faia lea o ni taaloga faigofie ma tamaiti. E pei o le faagaioiina o maso o le tino e ala i le savali faamalō ona faavaivai lea o le tino e pei o le supaketi, o le faataitai lea o ituaiga ata, ata leotele, ata faalili poo le ata aamu.

O nei faatinoga uma sa faapea lava ona faataitai lo latou faatinoina e faiaoga, aoao ma faletua i lea aso. Ma e tiga lava le mugala, ae sa vaaia le fiafia ma le gaua'i o le Kolisi e fia iloa nei faatinoga taua. E ui lava sa tele i le ata ona o le malie o nei faiga, ae e le taumate le tele o le tomiai fou ua maua mai lea aoaoga.

Sa maea le aoaoga ona saunoa lea o le Susuga i le Alii Pule, e momoli le faafetai i e sa latou taitaiina le aoaoga, faapea le SUNGO mo le sauniaina o lenei polokalame. O le naunautaiga o le Susuga i le Pule, ina ia mafai i lenei tomiai fou ua maua e faiaoga, aoao ma faletua ona fesoasoani ai ia i latou ua afaina i le galulolo, e ala i le agalelei a le Kolisi o loo faatinoina pea. E le gata i lea, e le taumate le aoga o lenei aoaoga i le galuega faafaifeau o lo o alo atu i ai i latou i le lumanai pe a faaagaina i latou i le galuega a le Atua.



Vaai i faatinoga sa faia i le malae



Aoaoga i fesoasoani faalemafaufau a le susuga ia Byron Seiuli

FONOTAGA A LE FAALAPOTOPOTOGA O GALUEGA FAA-MISIONARE A LE LALOLAGI (FGFL) I MALUA, 2009

O sina tala otooto lenei faa-sui usufono o le Kolisi Faafaifeau i Malua i le fonotaga a le FGFL poo le Council for World Mission na usuia i Malua lava i le aso 18-25 o Setema, 2009.

O lenei fonotaga sa faatino lava mo le itulagi o le Pasefika. O le faamoemoe o le ofisa tutotonu ole FGFL, ia aoao ma tapenapena ni taitai latou te faia le galuega faamisionare mo tamaiti. E le natia le ma'ale'ale o le soifua ma le ola o tamaiti. A ua le fesoasoani foi le lofia o le atu Pasefika i le anoanoai o faafitauli ua lamatia ai fanau. O le ala lea o le ave o le faamamafa e le FGFL mo galuega faamisionare mo tamaiti, ae manaomia le tapena lelei o ni taitai e faatinoina lea galuega.

1. Fausia o ni aiga saogalemu. O le uluai nofoaga o le saogalemu o fanau, o le aiga. E taua tiute faamatua i le fausiaina o tamaiti fiafia, atamamai, saoloto ma ola maloloina. O le faamoemoe o lea taiala, ia aoao taitai ina ia avea ma matua fai tama lelei.

O le a le fesootaiga o lenei taiala

ma lenei itulagi? O le atu Pasefika ma lana filosofia, e faamamafa le sasa e aoaoina ai tamaiti. Peitai, e tele atu aafiaga leaga nai lo le lelei. O le ala lea e taua ai le aoaoina o taitai i tiute ma faiva faa-matua lelei.

2. Tapenaga o le lotoifale e avea ma nofoaga e talia lelei ai tamaiti. O le fesili taua lava ua lagaina ai lenei taiala: E faapefea ona avea tamaiti ma sui taua o se aulotu? O a mea ua vaoia ai tamaiti mai le avea ma sui auai o se aulotu? E faapefea ona aapa atu le Ekalesia i tamaiti ua le fiafia e omai i le lotu? Ioe, e manaomia e tamaiti ni nofoaga saogalemu latou te lagonaina ai lo latou taua ma le amanaiaina; nofoaga e mafai ai ona faailoa saoloto o latou lagona.

3. Faatautee i le felauaiga o tamaiti. O le faafitauli tuga o nei vai-tau o le felauaiga o tamaiti mo manaoga eseese. Ua faatau e fai ma auauna, tagata faigaluega, ma pologa foi i nisi atunuu.

O tamaiti e feoai solo i le auala e faigofie ona aafia i ia faiga. E tatau ona mataala le malo ma le Ekalesia i le foia o nei faafitauli e ono tutupu i

lenei itulagi.

4. O le faatautee i le sauaina o le fanau. O le faafitauli e le faapito i se itulagi e tasi, ua sosolo faa-faamai i le lalolagi atoa. E taua le faailoa i tamaiti o latou aia tatau.

I le vaai masani faa-Pasefika, e le tele ni aia tatau o ni tamaiti, vagana ua avea ma tagata matutua. E tusa lava pe taua i totonu o se sosaiete, ae ao lava i ai latou ona ava ma usiusitai i e matutua. Peitai, o le faamoemoe o lenei fonotaga, ia iloa e tamaiti a latou aia tatau. E tatau foi i le tamaititi ona matau uiga le talafeagai o e matutua atu i ai latou.

5. Aiaiga e puipuia ai tamaiti. E tatau i soo se Ekalesia poo se aulotu ona faataoto ni taiala e faagasolo ai galuega faa-faifeau e puipuia ai tamaiti.

O ni taiala sa faatalanoaina lava ma le faamoemoe ina ia faatamaoai-gaina atili ai sui auai o le fonotaga ma le faamoemoe ia faasoa atu lenei malamalama i aulotu taitasi faapea le Ekalesia Aoao aua le manuia lau-tele o lana galuega faa-misionare.

TALIMALO MALUA I LE FONOTAGA A LE FGFL

E tasi le vaiaso (18-25, Setema, 2009) sa talimalo ai Malua i le fonotaga a le FGFL mo lenei itulagi o le Pasefika sa faatau lea mo le aoaoina o i latou e feagai ma galuega mo le fanau (CWM Pacific Regional Training for Trainers: Mission with Children, faith seeking justice). O le filifilia ai o Samoa e talimalo, ona o se valaaulia a le Susuga i le Toeaina, Rev. Tavita Roma, lea sa auai i fonotaga faapea i atunuu i fafo.

Sa faatinoina lenei faamoemoe i le maota fou o le Malua Mission Centre, lea sa faaulufaleina i le taimi o le Fono Tele a le Ekalesia ia Me, 2009. Peitai e tele ni galuega sa toe faia e aoao ma faiaoga Malua mo le faaleleia atili o lenei nofoaga mo ana taligamalo, faatasi ai foi ma le taliina o malo i le vaiaso atoa, sa patino tonu lea i Faletua ma le Komiti faafoe, ma nisi o sui mai le Ofisa Tutotonu o le EFKS.

Sa tatalla aloaia lenei fonotaga i le



fa'aauau itulau 7

O le Malua Mission Centre na tali ai Malo a Malua

mai le itulau 6

sauniga lotu i le Fale lupeli, sa taitaia lea e le Pule o le Kolisi, Rev. Otele Pere-lini. O le Taitaifono o le Fono Tele, le Susuga i le Toeaina, Rev. Esekielu Situfu Esekielu sa saunia le lauga. Sa auai uma ai sui usufono uma, le Kolisi Faafaifeau i Malua ma le toatele o Susuga i faafeagaiga o le Ekalesia. O le saunoaga aloaia sa faia lea e le Failautusi mo Galuega Faa-misionare a le CWM, le tamaitai o Mrs Elizabeth Joy. O le maea ai o le sauniga sa faailoa mai ai uma sui usufono ma isi faasilasilaga mai le Failautusi Aoao a le EFKS, Rev. Iusitone Salevao.

O le maea ai o le sauniga, sa faatinoina e le Kolisi le ava o feiloaiga, e faafeiloai ai malo usufono ma faailoa atu ai tu ma aga masani faa-Samoa, e faatino i ana taligamalo. Sa faaalua le fiafia o i latou uma i lea tulaga.

O i latou sa usufono sa malaga mai atunuu eseese o le lalolagi e iai Matakasa, Peretania, Hungary, Guyana, Initia, Afrika i Saute ma isi mai le Pasefika.

O le maea ai o fonotaga i le vaiaso atoa, sa faia ai se aiga faamavae na saunia e le Kolisi i Malua, ma sa auai sui usufono uma, faapea le toatele o le mamalu i faafeagaiga ma o latou Faletua. O se po fiafia mo tagata uma ma sa vaaia ai foi tu ma aga eseese mai isi atunuu sa faatino e ala i taleni, pesepesega ma aitema mai sui usufono uma. Sa faapea foi ona faia ai pesepesega a le Aoga Aso Sa ma le



Sui a le Fonotaga mai Niu Sila



Maafala, Tavita Roma, Marlon Fraser, Makes, Tailua Roma



Faamavaega ma Sui o le Fonotaga

Autalavou Laiti a Malua, ona o lenei fonotaga sa patino tonu mo le aoaoina o le fanau.

E pei ona sa amata i le Atua, sa faaii foi i le Atua lenei fonotaga i le sauniga lotu sa taitai e le Susuga i le Toeaina Rev. Esekielu Situfu Tanielu, o tatalo sa faia e le Faletua ia Sinatala Leota, o le faitauina o le Tusi Paia, o le Faletua ia Lotu Latai ma le lauga mai le Sui Taitaifono, le Susuga i le Toeaina, Rev. Tavita Roma, o ia foi lea sa faatinoina le sakarameta o le Faama-

natuga.

O le Susuga ia Mr. Marlon Fraser mai Guyana sa fai ma sui o le au usufono, e faaalua le faafetai i le Kolisi, le Ekalesia Aoao, mo le taliaina lelei o le fonotaga. Sa tufatufaina ai foi ma faailoga mo le au usufono ona sosoo ai lea ma le saunoaga faafetai a le tamaitai o Elizabeth Joy, i taitai o le Ekalesia, le Komiti faafoe o le fonotaga, i latou sa saunia pepa o le fonotaga, aemaise ai lava le Kolisi mo le tapenaina ma le taliaina o le fonotaga.

INITIA 2009: POLOKALAME "FACE TO FACE" A LE C.W.M

O le faafetai e tumau i le Atua mo mea lelei uma ua ia faia mo lo tatou ola. E faafetai ai foi i le Komiti o le Maluapapa mo le avanoa e faasoa atu ai se manatu e tusa ai ma le polokalame sa feagai ai i Initia mo le valu vaiaso.

O le avea ai ma sui auai o le polokalame faamasani i Initia mo le tausaga 2009, o se tasi lea o mea taua i lou olaga. O se polokalame na faapupula ai lou tagata i le ofoofogia ma le matautia o nisi o faafitauli o loo feagai ma lo tatou soifuaga i lenei vaitau.

Ona o le tele o eseese ma vae-ga i ona tu ma aganuu faapea foi ona talitonuga, e iai le manatu o Initia o se tasi lea o vaega o le kelo e ala-gatatau ona ausia e ni a tatou galuega faamisionare.

O le faagasologa o lenei Polokala-

me, sa matauina ai le anoanoai o matagaluega tutoatasi o loo galulue soosoo tauau e fausia se faamoemoe mo i latou o loo nonofo i nofoaga e lafoai i ai lapisi o taulaga. Ma o le agaga faafetai ina ua mafai ona avea lenei polokalame e avea ai lou tagata faatauvaa ma sui o nei faalapopotoga e auala atu ai se fesoasoani mo i latou o loo taotaomia i le mativa ma le le tagolima. Ua tele foi ni aoaoga ua ou maua mai i lenei polokalame i ni auala e ono faaogaina ai la tatou fesoasoani mo nai nei foi tagata o loo taotaomia lava i lalo o la latou aganuu ua ta'ua o le "caste system."

Tusa ai ma faamaumauga ma sailiiliga o le numera o tagata matitiva i totonu o le atunuu o Initia e le ono oo i se tulaga e faaititia ai i se taimi vave, peitai o loo i ai pea le faamoemoe i galuega alofa a nei Sama-

ria agalelei poo lotu Kerisiano i lalo o lala o matagaluega tumaoti e ono faaleleia ai le tulaga i le soifuaga o nai nei foi tagata.

E le itiiti ai le agaga faafetai i le CWM, le susuga i le Alii Pule o le Kolisi Faafaifeau i Malua, lau susuga Porofesa Otele Perelini, faapea le ofisa tutotonu a lo tatou ekalesia. Faafetai faapitoa i le faletua ia Tau-muafa Toma Salesa, i le tapenaina o lenei polokalame taua, ma le avea ai o lo'u tagata faatauvaa ma sui filifilia mo lenei polokalame e le au maua. Aua ua tele lava sona taua ua aoaoina ai lo'u tagata ina ia iloa ona tali atu pe a feagai ma faafitauli o le olaga, faatasi ai ma le faatuatua ia Iesu Keriso le Ao o le Ekalesia.

Faafetai,
Henry Ito

IA MOTU LE PA A UA ILOA...

MALAGA LE PULE O LE KOLISI I CRETE MO LE FONOTAGA A LE FAITH AND ORDER (WCC)

O le masina o Oketopa na auai atu ai le Alii Pule o le Kolisi i se tasi o fono taua a le vaega o le Faith and Order a le Fono a Ekalesia o le Lalolagi. O le susuga ia Otele Perelini o ia o se sui auai o le Pasefika, ma o se sui foi ua leva, o lea vaega taua o le Fono a Ekalesia o le Lalolagi. O lenei vaega e suesueina ma iloiloina ai le ola faatuatua ma le vaai faamataupu silisili a le ekalesia i le uiga o le taua o le avea ma tagata auai i le ekalesia a le Atua. Na faia lenei fono i le motu o Kereta, Eleni. O se tasi o nuu sa afea e le aposetolo o Paulo e pei ona faamauina i le Tusi Paia. Na saunia foi le pepa e le Alii Pule e faatauaina ai le vaai faapasefika i le uiga o le avea ma tagatanuu o le ekalesia a le Atua i le lalolagi. Ma o lea faamamafa e taua ai mea o loo mafatia ma puapuagatia ai tagata i le taimi nei i le lalolagi. Ina ia mafai ona maua se fesoasoani faaleagaga ma le vaai faamataupu silisili i tagata o le ekalesia a le Atua e foia ai nei tulaga faigata. Taua e le Alii Pule le taua ma le aoga o lenei fefaasoai e maua ai manatu lelei mo le ola faatuatua aemaise o le fatufatuina o mataupu silisili e fetau ma agai tonu i mafatiaga o loo feagai ma le ekalesia i le lalolagi nei.

FEATUNAI MA PERISE LIUAANA MO SANDRINGHAM EFKS

O le masina o Setema na faataunuina ai le osiga feagaiga a Featunai ma Perise Liuaana ma le Ekalesia EFKS i Sandringham, Aukilani Niu Sila. O Featunai ma Perise sa galulue faafaiaoga i Malua mo ni tausaga se tele. Na avea foi ma sui pule o le Kolisi i tausaga e tolu ae valaauina loa mo le galuega faatausinuu. O ni auauna aoga ma le tausaaia ma e faagalo gata i le Alii Pule ma le Kolisi. O Featunai ma Perise na galulue foi i le faletusi a le Kolisi ma e tele ni suiga lelei o le faletusi i lalo o le taitaiga a i laua. E le gata ua faalateleina le avanoa mo tusi faaopopo faapea ai suesuega a Aoao, ae ua faafouina foi le potu komepiuta. Ua faaopopo le aofai o masini faapea ai ma le faigofie ona maua le auaunaga faa internet. O le tatalo a le Alii Pule, faiaoga ma le Kolisi, ia manuia le galuega ua feagai ai i le faatasi o le Atua.

AUFAIGALUEGA FOU O LE FALETUSI

Ua faamaonia e le Komiti o Malua le faafaigaluegaina ai o nisi o faletua o faiaoga i le Faletusi a le Kolisi. O i latou ia o Lalokava Lima, Mile Nofoaiga ma Sinuanua Nefu. Ua avea i latou ma fesoasoani i le susuga ia Peni Leota, o ia o loo feagai ma le vaaia o le Faletusi. O se tulaga lelei tele lea aua ua faateleina tiute fai i totonu o le Faletusi aemaise ai foi ma le vaaiga o le internet cafe. Aua foi, o le internet cafe o loo faafouina i lalo o le vaaiga a le Faletusi. Ao se isi itu e matagofie atili ai ona o le faaogaina o taleni a nei faletua aemaise le tausaaia e tuuina le fesoasoani mo i latou uma e faaogaina lenei faletusi mo suesuega e le gata i tusi faitau ao le internet foi. Ia faamanuia le Atua i le feagai ai mo lenei auaunaga aoga mo lana Kolisi.

MASINI FOU MO KOPI A LE FALETUSI

Mo le faaleleia atili o auaunaga a le faletusi a Malua na ae ai se manatu e toe faatau mai se masini fou e faia ai kopi e moomia e aoao ma faletua faapea ai foi faiaoga. O lenei masini mo kopi na faatauina mai le Maxkar. O loo iai le tele o ona agavaa faaonapo nei e faafaigofieina ai ma atili vave ai le faagaoiina o lenei ituaiga auaunaga. Ua matua faafiafiaina tele ai le Kolisi ona o se tasi lenei o auaunaga moomia tele e fesoasoani i suesuega o loo feagai ai.

TOFI A MALUA I LE FELAUGAIGA A SUI O LE FONOTAGA A LE FGFL

O se tasi o polokalame a le Fonotaga a le FGFL o le o atu lea o sui auai e lolotu ia tatou aulotu i le Aso Sa muamua o lea fonotaga. Ma o ia foi avanoa e mafai ona taitaiina ai e sui auai o iai tofi faifeau ia sauniga lotu. Sa faapea ona maua ai le tofi a Malua mai lea felaugaiga. O se tasi o vaaiga faagalo gata ona o lea tofi, o se faifeau faiaoga mai Aferika i Saute. Ae le gata i lea, o ia o se tamaitai. O lenei tamaitai o se faifeau faauuina i se tasi o ekalesia i Aferika i Saute. Ae o loo umia foi le faailoga o le Doctor of Philosophy. O lona igoa o Genevieve James, o se tamaitai e i ai lona pito Initia ae na fanau ma soifua mai Aferika i Saute. Na matua faaalua le fiafia o lenei tamaitai i lea avanoa taua ua ia maua. Ao se vaaiga matagofie na molimauina ona o se tamaitai faifeau ua laugaina le Upu i le Fale lupeli aua e le masani ai Malua. Na faaiuina lenei mafutaga i se toonai ma faapea ai ona momoli le agaga faafetai i le tofi faapea ai ma se meaalofo faatauva na saunia e le Alii Pule ma le faletua, faapea ai ma le Kolisi.

TAAVALE FOU MO LE PULE O LE KOLISI

Ua tusa ma le sefulu ma le lima tausaga ao lenei faatoa maua se sa fou mo le Pule o le Kolisi. O le Nissan Double Cab Pick up ma o se fausaga fou lava o lea ituaiga taavale. Ua talia i le agaga faafetai lenei suiga ma o le a aoga tele foi mo le tele o tiute feagai ai ma le Alii Pule, aemaise i le atinaega o le Kolisi i nisi itu e fia faaleleia ai.

SAUNI LE SUSUGA IA MAKESI NEEMIA MO LE FAALAU TELEINA O LE AOA OINA I MELEPONE, AUSETALIA

Ua sauni atu nei le Susuga ia Makesi Neemia mo le sailia o lona faailoga o le PhD i le Whitley College i le Iunivesite o Meleponi i Ausetalia i le tausaga fou. O le Susuga ia Makesi ma le Faletua ia Torise ua atoa nei le 7 tausaga talu ona tautua i le Kolisi i Malua. Ma ua faamanuaina i laua i lenei avanoa taua e toe faalau teleina ai le tomiai aua le aotauina o alo ma fanau a le Ekalesia mo le galuega i le lumanai.

E le taumate o le a misia e le Kolisi le Susuga i le faiaoga ma le Faletua ona o le tele o la sao taua i le Kolisi, aemaise si a la fanau o le tama o Mase ma le teine o Violeti. O moomooga o le Alii Pule ma le Aiga Faiaoga faapea le Kolisi, ia manuia lo la alo atu i lea faamoemoe taua. Ia faaiuina le taumafai i le manuia ma ia toe taliu mai e faaauau o la sao taua mo le Kolisi Faafaifeau.

TAUAAOINA LE MEAALOFA A LE VASEGA FAAIUASO 2009

Na faalauiloaina i le aiga faaleaiga mulimuli o lenei tausaga a le Kolisi le meaalofo tupe a le Vasega Faaiuasos e tusa ma le \$20,000 tala mo le faatogaina o le Malua Mission Centre i itu tau meafale. Na talia i le fiafia ma le agaga faafetai lenei foai tele ma o le a faapea foi ona faaogaina i le itu na tuuina mai ai. O nei faatinoga e faaleleia atili ai lenei maota mo le faaogaina e le Kolisi e ala i ana aoao singles faapea ai ma galuega faamisionare a le EFKS. Faamanuia pea le Atua i le agaglelei ma le alofa faaalua aemaise le manatu mo le faaleleia atili o lenei Kolisi ma ana meatotino.

MEAALOFA MAI EKALESA I AMERIKA

E lei mafai lava ona faagaloina Malua e aulotu i Amerika ia latou fesoasoani mo Samoa ao feagai ai ma mafatiaga o le galulolo. E anoanoai ia foai na tauaaoina ma sa faapea ona aoga tele i le faatinoina o le galuega fesoasoani a le Kolisi mo aulotu ma nuu na mafai ona oo atu i ai. O lea e fia faamauiina ai le agaga faafetai o le Kolisi i lenei agaglelei tele faapea le loto fesoasoani o nai o tatou tagata o loo aumau mamao mai ao tatou o i ai i nei taimi faigata. Faamanuia tele le Atua i le alofa ma le agaglelei ua faaalua.

MEAALOFA MAI LE MATAGALUEGA A KUINISELANI, AUSETALIA

Na faapea foi ona afea le Kolisi i Malua i le fesoasoani a le Matagaluega a Kuiniselani mo tagata mafatia i le galulolo. Ina ua maea le tauaaoina o meaalofo mo nuu mafatia na faapea ai ona tuuina mai se fesoasoani e ala i ogaumu kesi e tolu faapea ai ma pepa (vouchers) e mafai ona talaina mai ai kesi mai le kamupani kesi o le Origin Gas. O le susuga i le Tiakono Toeaina a Kuiniselani na fai ma fofoga o le Toeaina Faatonu ma Faafeagaiga o le Matagaluega e momoliina mai lenei meaalofo. O le susuga ia Maafala Lima (Sui Pule) na talifuaitau ma faafetaia le aao mafola e fai ma sui o le Alii Pule faapea le Kolisi ona o lenei meaalofo aoga ma le taua.

FALEOO FAATALI PASI

O le vaiaso e tasi o le tuuaga o le Lotu Tamaiti sa faatinoina ai e le vasega faaiuasos le galuega o le fausiaina lea o se faleoo faatali pasi i le isi itu auala i tafatafa ane o le vai taele o le Kolisi i luga o le sami. O lenei faamoemoe ina ia mafai ona iai se nofoaga e mapu iai le au faatali pasi, ina ua suia le itu auala e feoi ai taavale e pei ona faatulafonoina e le malo i le aso 7 Setema 2009. E tasi lava le vaiaso sa faia ai lenei galuega, i lalo o le taitaiga a le Sui Pule o le Kolisi, le susuga ia Maafala Lima. O pou pomuli o le fale sa sailia lava i totonu o le Kolisi, ao laupapa ma apa sa faatauina mai Apia i se seleni a le Kolisi pe a ma le \$5,000.00. O lau o loo ato ai le faleoo sa fesoasoani mai ai nisi o aiga o le vasega faaiuasos ma na suiina lava e i latou. E momoli le faafetai i le vasega faaiuasos 2009 mo lenei galuega lelei. Ia viia le Atua i lo outou soifua galulue ma ia faamanuia le Atua i laasaga uma o le lumanai.

NISI O VAAIGA I LE KOLISI



Faafiafia le Autalavou Laiti a Malua



Nisi o Faletua o Faaiuasos



Faaaogaina o le Malua Cybercafe

FILIFILIA LE SUSUGA IA MAAFALA LIMA MA LE FALETUA E AVEA MA SUI- PULE O LE KOLISI



Maafala ma Lalokava Lima

Ua avea nei le Susuga ia Maafala Lima ma le faletua ia Lalokava e fai ma Sui-Pule o le Kolisi Faafaifeau. Ua sui tulaga i laua i le Susuga ia Featunai ma Perise Liuaana, ina ua faamavae atu le Kolisi ia i laua i le masina o Iulai. O le Susuga ia Featunai ma le faletua ua galulue nei i laua i le Ekalesia a Sandringham i Aukilani, Niu Sila.

O le Susuga ia Maafala ma le faletua ua tele tausaga o le la auaunaga i totonu o le Kolisi. Ma ua faaalua foi lo laua fiafia ma le agaga faafetai e tusa ai ma tofiga ua valaauina ai i laua. Ua avea foi le faletua ia Lalokava e suitulaga i le faletua o Perise, e galue ai i le Faletusi a le Kolisi.

O faamanuiaga a le Kolisi, ia manuia tele lo laua tulai mai e lagolagosua i le Susuga i le Alii Pule i le taitaiina o le Kolisi aua le agai pea i luma i se lumanai manuia.

ASIASI MAI LE SOUTH SEAS CHRISTIAN MINISTRY MO LA LATOU MALAGA MASANI I LE KOLISI

O le tausaga nei ua atoa ai le 10 tausaga talu ona asiasi mai le South Seas Christian Ministry mo lana malaga masani i le Kolisi i Malua. O se faailoga lea o le mafanafana o le mafutaga a le Kolisi ma lenei Sosaiete Faa-misionare.

O le South Seas Christian Ministries sa faavaeina i se taiala, 'Ia oo le Alofa o le Atua i soo se Tamaititi i soo se Alalafaga'. O lo latou talitonuga e mafai ona ausia lenei manulauti e ala i faatinoga, e pei o taaloga ma nisi o galuega faatino e pei o pese faitaga ma tala faaevegalia.

O lenei la tausaga na malaga mai ai se vaega e toa 16, o tama ma teine talavou mai se tasi o aulotu i totonu o Los Angeles. O lenei vaega sa feagai ma le taitaiina o a latou polokalame eseese mo le vaiaso atoa. Sa vaaia le fiafia o fanau a Malua, e le gata o le Aoga Aso Sa ae faapea foi i le Autalavou Laiti.

E le gata ia latou polokalame mo fanau, ae sa faapea foi ona saunia ni a latou aoaoga mo aoao. O le Porofesa i le Feagaiga Fou o Dr. D.H. Shearer sa faia ni semina i mataupu tau le Feagaiga Fou mo aso e tolu. Sa faapea foi ona faia ni aoaoga a le alii faifeau o Pastor Ron Denton i mataupu tau le Galuega Faa-Kerisiano. O le faasoa mai o nei alii ua manatu ua atili faatamaoaigaina ai susuga i aoao.

O le malaga mai o le South Seas Christian Ministry i lenei tausaga e le gata ua tele mataupu taua na



South Seas Christian Ministry Team with Otele and Julie



South Seas Christian Ministry Team

fefaasoaai ai ma le Kolisi, ae ua atili faatupulaia ai pea le mafutaga


vavalalata a nei Samaria agalelei ma le Kolisi Faafaifeau.

MALUA INTERNET CYBERCAFE

O le Malua Internet Cybercafe, o se poloketi ua leva ona moemiti i ai le susuga ia Otele Perelini ma le paia o le vasega o faiaoga. O se faalepo ua leva ona nofo tatalo ma faatalitali i ai le aoga i Malua mai tausaga ua tuana'i. Aua foi, o le vaitau ua i ai nei le gasologa o le olaga ua ta'ua o le vaitau o tekonolosi ma auala televavave i fesootaiga faale-va o malo ma le lalolagi atoa.

E 27 le aofai o masini komepiuta sa faapena ona okaina mai le CSL ma le talosaga i lea kamupani latou te faapolokalameina masini uma. O isi vaega e pei o uaea eletise ma laulau sa maua mai lava i le faletusi o Malua lea sa iai le internet tuai. O nisi o mea faigaluega sa faatino ai le galuega sa maua mai le CSL. Tusa ai ma le vaiaso muamua o le tuuaga o le fonotele a le EFKS, sa faapea ona toai taunuu mai ai le oka o masini komepiuta ua uma ona faapolokalameina ma ua toe lava o le faapi'iina.

O le toe a'e mai o le Kolisi mai lana malologa, sa faapena loa ona logoina



Otele Perelini i le uluai tatalaina o komepiuta

ai le susuga i le Alii Pule e tusa ai ma le maea o le galuega. O le aso 8 Iuni 2009 sa manatu ai le Alii Pule e tatala aloa'ia ai loa le Malua Internet Cybercafe ma faataunuaina ai se tasi o miti sa taupoina a le Kolisi o Malua. Mai lava i lea aso, o lo'o matauina lava le aoga tele o lea faamoemoe i le faaoga ai e susuga i faiaoga ma a'oa'o ma o latou faletua, faapea malo fai mai i le Kolisi. O le taimi nei, ua i lalo nei le Cybercafe i le taitaiga a le susuga ia Peni Leota ma le feasoasoani a le susuga i le faiaoga ia Alesana Pala'amo. O Apineru Faasavalu ma Fotu Perelini o loo gafa foi i laua ma le tele o galuega mo lea auunaga. E le gata i lea, o le faafoeina o le potu komepiuta i aso aoga o lo'o feagai lea ma le faletua o Sinuanua Nefu aemaise ai le lagolagosua mai o



Featunai ma Otele a'o faailoa mai le Cybercafe

le faletua o le Sui Pule o Lalokava Lima ma le faletua ia Mile Nofoaiga.

E talitonu le agaga o se poloketi taua lea i se isi itu aua foi le faaleleia atili o itu tau le a'oa'oga o lo'o feagai ai ma susuga i faiaoga, a'oa'o ma o latou faletua aemaise ai le paia ma le loaloa o Malua nei. Pei ona saunoa le susuga i le Alii Pule ia Otele, "This is Malua's future, today and tomorrow." Ia tau ina alofa le Alii ma faatumauina le agai i luma o lenei faamoemoe.

O se tala pu'upu'u atu lena e tusa ai ma le faataunuaina ma le galueina o le Malua Internet Cybercafe. O nei mea uma, talitonu se manatu ua faia lava mo le viiga o le Atua ma lona finagalo. Ia manuia lava le alo atu o le Kolisi i lana malologa mo le Kerisimasi ma le tausaga fou.

AOGA TUSI PAIA MALUA

O le faafetai i le Atua e silisili lava lea ina ua taunuu i le tini galuega o lenei tausaga. Ae faapitoa le faafetai i le Ekalesia Faapotopotoga Kerisiano Samoa i lau tatalo ma le tapuaiga. Malo fai o le faiva. O sina ripoti puupuu i le gasologa o le Aoga Tusi Paia Malua i le vaituuaga mulimuli o lenei tausaga, 2009.

E toa 75 le aofai o le aoga. O lenei faitau aofai o loo tuu faatasia ai faletua o aoao ma le mamalu o le atunuu o tausavali mai i tua. E pei o faiga faavae o faagasolo ai lenei aoga, e 13 vaiaso o le vaituuaga, e aofia ai ma vaiaso o suega.

E sefulutasi (11) mataupu sa aoaoina i lenei vaituuaga. E tolu mataupu faapitoa a le Matagaluega a le Feagaiga Tuai, tolu mataupu faapitoa a le Matagaluega a le Feagaiga Fou, lua le Matagaluega a le Mataupu Silisili, tasi le mataupu a le

Matagaluega e gafa ma le Talafaasolopito ole Ekalesia, ma le lua a le Matagaluega o Matafaioi Faa-faifeau. O faifeau faiaoga lava e sili ona agavaa o nei matagaluega taitasi na latou aoaoina nei mataupu.

E maea la suega faaii o lenei tausaga lea sa faia ia Novema, ua tulai mai e 28 i latou ua ausia le Certificate of Theology. O le toatele o i latou nei, o faletua o aoao faaiuas, ma le mamalu o le atunuu o tausavali mai tua.

E pei lava ona silafia i le lomiga o le Maluapapa talu ai, sa faia ai le uluai faauuga; ma e toa 33 e na ausia le Certificate of Theology. E i ai nisi o i latou nei na toe faaauau foi i lenei vaituuaga, ma e 15 e ua ausia iunite atofaina e agavaa ai mo le Diploma of Theology. E i ai la ma i latou e toa 8 na ausia lea tulaga ina ua maea suega ole vaituuaga mua-

mua lea sa faataunuaina ia Iuni 2009, ona maua ai lea o le aofaiga o e ua gafatia le Diploma of Theology e 23. Ua faatalitali nei e ua ausia le Certificate of Theology ma le Diploma of Theology mo le faauuina aloaia i se aso e tofa liliu i ai le Komiti o Malua. Ao le isi vaega toatele e fa'aaauu pea le taumafai i le tausaga fou 2010. Malo taupati, faafetai onosai.

Ia avea lenei avanoa e faaoo atu ai le agaga faafetai tele a le Pule o le Kolisi ma le vasega o faiaoga i le paia o le Ekalesia Faapotopotoga Kerisiano Samoa i ona tulaga faalupea, i la outou tatalo ma le tapuaiga aemaise le lagolago i soo se itu. Ia manuia le Kerisimasi ma le Tausaga Fou i le alofa ma le agalelei o le Atua.

Soifua.

MAFUTAGA FAAFUINA 2009



O se tasi o polokalame taua sa feagai ai ma le Kolisi i le tuuaga lona lua, o le Mafutaga Faafuina a Faifeau ma Aoao Tausinuu. Ma o lea faamoemoe sa faataunuuna i le aso 24-28 Aokuso, 2009. O le susuga i le Taitaifono o le Komiti a le Au Toeaina, Ioritana Tanielu na feagai ma le taitaiina o le mafutaga. Na tatala aloaia le mafutaga i le sauniga lotu na saunia e le Pule o le Kolisi i le Aso Gafua i le itula e 7pm.

O se tulaga sa faafiafiaina ai le Kolisi i lenei mafutaga, ina ua molimauina le toatele o sui mai matagaluega a Niu Sila, Ausetalia, Hawaii, Amerika, ae faapea foi nai o tatou uso mai Amerika Samoa. Ae le gata i lea, o se taimi muamua lea ua tatalaina ai faitotoa o le Malua Mission Centre mo se taliga malo. Atonu o lea ua faataunu ai se

tasi o faamoemoe a le Sosaiete Malua Tuai ma le Ekalesia mo lenei fale.

O se mafutaga e tumu i le tamaoaiga i meaai faaletino ae faapea foi i meaai faaleagaga ona o aso uma lava, na saunia ai e susuga i faiaoga o le Kolisi ni pepa e faatalanoaina ma faasoa i ai manatu o le mafutaga. Ma o pepa nei na saunia mo lenei mafutaga;

1. 'O le Talafaasolopito o Isaraelu o loo i le Feagaiga Tuai ma ona Luitau.'

(Suesuega i le Feagaiga Tuai).
2. 'O le Mataupu Silisili mai le Va'ai a le Siosiomaga' (Theology from the Perspective of the Environment).

(Suesuega i le Mataupu Silisili).

3. 'O le Malaga Faatupu a Iesu i Ierusalem - Mareko 11: 1-11.'

(Suesuega i le Feagaiga Fou).

4. 'O le Faa-Faapotopotoga - Congrega-

tionalism.'

(Suesuega i le Talafaasolopito o le Ekalesia).

5. 'Faaletonu o le Tamaoaiga o le Lalolagi ma le Galuega Faafaifeau'

(Suesuega i le Galuega Faa-Kerisiano).

6. 'O le a le Tulaga Faatupu o Tavita? (2 Samuelu 21-24).

(Suesuega i le Feagaiga Tuai).

7. 'Ola Faapaiaina poo le Alofa: O le a se Manatu o Iesu? (Ioane 1: 17).

(Suesuega i le Feagaiga Fou).

8. 'Suesuega Faaneionapo i Aoaga Kerisiano.'

(Suesuega i le Galuega Faa-Kerisiano).

E lua ni tautalaga faapitoa na valaauina e le mafutaga. O le tina ia Moelagi Jackson na faasoa mai i le faavae autu ma faagasologa a le polokalame o le 'SUNGO'- Samoa Umbrella of Non Government Organisations, ma le Afioga ia Tusa Misi Tupuola na fai lana tautalaga e tusa ai ma le sauni atu o le atunu mo le suiga o le itu-auala.

Na faaiiina lenei mafutaga i le lotu faamanatuga i le Fale Lupeli faatasi ai ma upu timai ma upu faalaeiau a tama o le Ekalesia mo le aufaigaluega tausinu, faapea foi mo faiaoga o le Kolisi.

E fia faaleoina foi le agaga faafetai i susuga i faiaoga, aoao ma faletua sa fitaituga mo le tapenaina ma le faapolo-kalameina o lenei faamoemoe taua o le Ekalesia. Malo le faamalolosi, malo le onosai.

AOGA ASO SA

E muamua ona faafoi le viiga ma le faafetai i le Atua, ona o lona alofa ma lona agalelei ua taitai'ina mai ai lo outou soifua ma lo matou ola i lenei foi vaiata o le tausaga.

Ae o se ripoti lenei o le Aoga Aso Sa mo le kuata lona tolu, 2009. O le aofai o le fanau i le Aoga Aso Sa e 93, mai le 98 i le amataga o le tausaga. E to'alima tamaiti ua tuua le mafutaga ona o mafuaaga eseese. Mai le 93, e toa 45 tama ae 48 teine. O le **Vasega Amata** e toa 46 tamaiti, 20 tama ae 26 teine. O le **Vasega Laiti**, e toa 28 tamaiti. 11 tama ae 18 teine. O le **Vasega Feololo** e toa 11, e 4 tama ae 7 teine. O le **Vasega Matutua** e toa 11, e toatasi le tama ae 10 teine. O le aofai o tama ma teine i le autalavaou laiti e 20, e 10 tama 10 teine. O le aofai o tamaiti i le Aoga Aso Sa ma le Autalavaou Laiti a Malua e 113.



Vasega Amata - Malua

O le taimi nei, o loo faagasolo polokalame a le Aoga Aso Sa e tusa ma lana masani i lenei foi vaega o le tausaga e ala i le latou laau Kerisimasi, ae maise ai lo latou molimau i le afio mai o le pepe o le Kerisimasi.

E avea foi lenei avanoa le aumaua, e faaleoina ai la matou faafetai tele, i

le susuga i le Alii Pule, Polofesa Otele Perelini i le oa ma le tamaoaiga, le sosia faa-leagaga o loo ia taitaiina ai le Aoga Aso Sa i lenei foi tausaga. E le lava ni matou upu o loo ia i matou e faaleoina ai le agaga o le faafetai tele mai le taele o matou loto ona o lea galuega alofa aua le manuia o fanau a Malua. Faafetai, faafetai tele. Faafetai i matua, i Susuga i Faiaoga, aoao ma faletua ona o le galuega o loo outou faatinoina i lea aso ma lea aso e ala lea i lau tausiga alofa i le fanau. Ia tatou lagona le agaga o le faafetai tele i le Atua mo ana meaalofo.

Ia faamanuia pea le Atua ia tatou fanau, aemaise o lo latou ola tuputupu a'e. Ia manuia lava le Kerisimasi ma le Tausaga Fou.

Faafetai lava,
Sam Amosa (Failautusi Aoga Aso Sa)

MAFUTAGA AOA O & FALETUA

Sa amata galuega faaletausaga a le laulau o le mafutaga a a'oa'o o le Kolisi Faafaifeau i Malua 2009, ina ua sui tofi i le faaiuga o le tausaga 2008. Ma o le galuega muamua lava sa feagai ma le laulau, o tapenaga ia mo le faauuga, ma sa faataunuuna lea faamoemoe i le manuia, i le faatasi mai o le Atua.

Na ae le Kolisi Faafaifeau i Malua i le aso 11 Fepuari 2009, ma faafeiloai aloaia ai e le Susuga i le Pule o le Kolisi Rev. Prof. Otele Perelini a'oa'o ma faletua aemaise lava i latou o le suiga fou o lenei tausaga.

Sa amata faagasolo ai lava ma polokalame o galuega masani a a'oa'o ma faletua e pei o le tapenaina o fale, faamamaina o le aai, aemaise polokalame o Aoga Aso Sa, le Aoga Faataitai a tamaiti, o le saunia o potu aoga mo le amataina o aoga a a'oa'o, aemaise foi o faletua i le Bible School. Na amataina aoga i le aso 18 o Fepuari 2009.

O nisi o galuega tetele sa feagai ma a'oa'o i lenei tausaga, e aofia ai le tapenaina lea o le fanua o le 'Tuloto' e faatu ai le fale o le Mission House e pei ona iai nei. Na amata tatu'u i lalo laau o mago, niu, vi, ulu ma tamaligi tetele i le aso 23 Novema 2008. Ma sosoo ai lava ma galuega a tufuga le konekalate sa fauina le Mission Centre, i le tuuaga o le Kerisimasi ma le Tausaga fou. Sa fesoasoani malosi foi le Kolisi i nisi o galuega e faamaeaina ai le Mission Centre e pei o le vali, tiles, fa'aalo, o le pa-uaea faataamilo ma le toga-laau e pei ona faamatagofie ai nei lea maota fou o le Kolisi.

O le faamatagofieina o le aai ae maise le gataifale i toga-laau e pei

ona iai nei, ma le faamamaina o le vai-laumei mo mataaga, o le isi lea galuega faifai pea a a'oa'o.

O nisi nei o galuega ma tapenaga sa feagai ma a'oa'o ma faletua a le Kolisi i lenei tausaga, e ese mai i a latou galuega masani:

Kuata Muamua

1. Fausiaina o le fale-taalo o a'oa'o (GYM), o loo tu faafesaga'i ma le fale o le pulega a Safotulafai.
2. Faauuga muamua a le Bible School, sa faia lea i le Fale lupeli, sosoo ai ma le taumafataga i le malae.
3. Umusaina o le Mission Centre, faia i le vaiaso muamua o le Fonotele ia Me.

Kuata Iona Lua

4. Mafutaga o le So'o ma le Kolisi Faafaifeau i Piula.
5. Fesoasoani i galuega o le sosooina o le Faletusi, (Library - internet cafe).
6. Mafutaga Faafouina a le Au-Faigaluega.

Kuata Iona Tolu

7. Taligamalo i le South Seas Christian Ministry.
8. Taligamalo Fonotaga - Council for World Mission (CWM).
9. Ofoina o le Fesoasoani (meaai, lava-lava, ma tupe) ma tufatufaina atu loa i faifeau ma nuu ua puapugatia i le Tsunami.
10. Faataunuuna o Galuega Fesoasoani i le tapenaina o fanua ma fale o nisi o Ekalesia ma aiga ua aafia i le Tsunami.
11. Tufatufaina atu o Fesoasoani mai Amerika i nisi o faifeau ma nuu ua aafia i le Tsunami.
12. Na faia e le Vasega Faaiuso le 'Falefaatali Pasi' e pei ona i ai nei i tafa-tafa o le vai.

O le tuuaga o Aokuso sa auai atu ai nisi o le mafutaga a a'oa'o ma faletua i le faaiipooga a le faaiuso i le nuu o Matavai i Savaii. Ma sa faapea ona fai

ai ma le tofiga mo le Aso Sa i le Matagaluega a le Itu o Tane.

Sa faaiuina suega a a'oa'o ma faletua o le tausaga faaleaoaoga 2009 i le aso 19 Novema. O le po o le Aso Faraile 20 Novema na faataunuuna ai le palota mo le suiga o tofi o le mafutaga a a'oa'o ma faletua o le Kolisi mo le 2010, ma ua tulai mai ai nei, le susuga o Ioane Aloalii ma le faletua ia Silaumua mai le Matagaluega a Kuiniselani i Ausetalia i le tofi Peresetene, ma le susuga ia Eric Mulitalo ma le faletua ia Amata mai le Matagaluega a Faasaleleaga i le tofi Failautusi.

O le aso 22 Novema o le Aso Sa mulimuli lea o le Kolisi i ana galuega faale-aulutua ma sa feagai ai foi le mafutaga a'oa'o ma faletua i le faamaopoopoina lea o a latou faiga taulaga o le Me o lenei tausaga.

O le aso 28 Novema o le Faauuga lea o a'oa'o ma faletua faaiuso ma le Faamanuia a le Kolisi Faafaifeau mo le 2009.

Faafetai tele i lau susuga i le Pule o le Kolisi ma lou faletua, faiaoga ma faletua, le mafutaga a a'oa'o ma faletua ona o le avanoa sa outou tuuina mai mo i ma'ua ma le susuga i le Peresetene ma o ma taitoalua, e faatino ai se auau-naga faalelava e ala i le laulau a le mafutaga i lenei tausaga. Faamagalo ni sese o le laulau 2009. O le Alii lava na fetalai, a uma ona tatou faia o ia mea ona tatou faapea ane lea o auaua le aoga i tatou.

Ia iai pea le manuia o le Atua i totonu o ou pa Malua.

O le a le galo pea oe Malua i le loto! Ia manuia tele le Kerisimasi ma le Tausaga fou.

Faia ma lo'u faaaloalo tele

Fuifui Te'evale

Failautusi - Mafutaga a'oa'o ma faletua



Fuifui, Roberta, Tula ma Falefa - Laulau Mafutaga a Aoa ma Faletua 2009

MALUA KINDY-KUATA 3

E viia le alofa ma le agalelei o le Atua, auā o lana pule faasoifua ua mafai ai ona tatou taunuu mai i le faaiuga o feau ma galuega o lenei tausaga.

O le amataga o le kuata mulimuli o le aofai o tamaiti e 16. E toavalu teine ma tama e toavalu foi. E toalua tamaiti faaopopo ina ua atoa le tolu tausaga.

Faiaoga

E toaiva faletua o aoao sa matou galulue faatasi i lalo o le faaululuga i le Susuga i le faletua ia Julie Perelini. O Naomi Misa, Nuuausala Fare-sa, Taleta Faavae, Pauline Leiolfi, Tauese Otto, Fofoga Setefano, Navy Motu, Tuae-fu Sasa ma Elalaumate Tunupopo.

O Autu

O nisi nei o autu sa tasi i ai faiaoga ma le faletua ia Julie ina ia aoaoina.

-Auala o Femalagaiga (Transport) Lua vaiaso

- Tagata Folau (Pirate) Lua vaiaso

-Iniseti (Insects) Tasi le vaiaso

- Galuega Taulima (Handicrafts) Lua vaiaso

- Teuteuga o le Kerisimasi (Christmas Decoration) Lua vaiaso

O le faaiuina o galuega ma le autu o le vaiaso, sa faatino ai lava pe tauluga i le toe aofai o galuega (activities) ina ia malamalama lelei tamaiti. I le autu o *Transport* sa fausia le pasi e faiaoga i se atigipusa lapoa, ona valiina lea e tamaiti, ma sa mafai ona latou faatino ai le avepasi, "supa-kako" ma isi lava



Malua Kindy 2009

upu (terms) e uiga i auala o femalagaiga. Sa fiafia ai tamaiti ona sa faatino i fafo i le paolo. O tagata faomea (Pirate), sa faia foi teuga uma, ona avea ai lea o i latou ma tagata folau o le sami. Sa fiafia foi tamaiti i le autu o Iniseti, aua sa mafai ona suesue ma saili i iniseti i lalo o laau. O galuega taulima, sa fesoasoani iai faiaoga i le lalagaina o le mailo, faiga o salu ma teuga e mafai ona faia i launiu ma laufala. O teuga o le Kerisimasi, sa umi se taimi o galulue ai tamaiti ma faiaoga, ona e faaiu lava i le teuina o le potu atoa mo le koneseti a le fanau.

O le aotelega o le faatinoina o galuega fai a tamaiti, e i ai lava faiaoga i taimi uma, ina ia mafai ona tautalatala ma malamalama i upu fou ma autu. E toatele faletua e i ai tomiai eseeese i le

aoaoina o le fanau e ala i pese, solo ma tauloto. O le tele o aso e faia ai taaloga i fafo ma taaalo ai i meataalo.

Asiasiga

E tele vaega o le laumua na asia e le fanau, e pei o le vai laumei, pa povi ae peitai o le tafaoga i le McDonald, na matua faafiafiaina tamaiti, ona ua iai foi le suiga, ma ua ese foi le siosiomaga.

Tala o le Kerisimasi

O le vaiaso mulimuli i le aso 23\11\09 sa faia ai pesepe-sega ma tauloto a tamaiti. E faatino ai ma le tala i le fanau mai o Iesu, o le autu

tonu lea o le koneseti. Sosoo ai ma le tufatufaina o tusipasi ma meaaloa a tamaiti e Santa Claus. O se po matagofie ma felanulanuai ua le gata i teuga o le potu, ao le fanau i le faatinoina o le tala ia Iesu.

E momoli faapitoa le faafetai ia Julie Perelini mo le avanoa ua o matou maua i le aoaoina o le fanau i Malua, aemaise o ana metotia ma le tomiai ua maua mai le faletua. Faafetai foi i le Tama Pule Otele Perelini i le itu tau seleni aua le faaleleia o meataalo ma tusi a le fanau. E le faaititia foi le agaga faafetai i susuga i faiaoga ma matua i le lagolagosua i polokalame ma le galuega, ua manuia ai mea uma.

IA MANUIA LE KERISIMASI MA LE TAUSAGA FOU

Faafetai Lava

Vaisaili Toafa Palale

AUTALAVOU LAITI

E muamua lava ona sii le viiga ma le faafetai i le Atua ona o lona alofa ma lona agalelei, ua faataunuaina mai ai ma le manuia lo outou soifua ma so matou ola i lenei vaitaimi o le tausaga. E faafeiloai atu ai i lo outou paia i le suafa manumalo o lo tatou Alii Faaola o Iesu Keriso. Talofa, talofa lava.

Ao se ripoti puupuu lenei e tusa ai ma polokalame faapea nisi o galuega faatino sa feagai ai ma le Autalavou Laiti a Malua (Malua Junior Youth) mo lenei vaituuaga mulimuli o le tausaga 2009. O le amatatia ai o galuega a le Junior Youth mo lenei kuata, e tusa ma le toa 20 alii faatasi ai ma tamaitai o loo i ai i lenei polokalame. Ma o loo i lalo o

le taitaiga a le susuga i le Alii Pule, le susuga ia Otele Perelini. Faatasi ai ma le taitaiga a susuga i faiaoga, le susuga ia Terry Pouono, Aigofie Marino, ma faletua o Lemau Pala'amo ma Toese Pouono. O loo fesoasoani ai ma aoao ma faletua o le tausaga tolu faapea ai foi ma aoao ma faletua o le tausaga lua. O le amatatia ai o polokalame o lenei kuata sa faapea ona amata i polokalame o le Aso Toonai i le afiafi 7.00pm. O lenei polokalame, e faatinoina mo le faamoemoe ina ia faamalosi ai le ola atoa o le talavou. E aofia ai aoaoga mo le malosi i le tino, mafaufau atoa ma le Agaga. O lenei faamoemoe e aofia ai aoga Tusi Paia (Bible Studies), Finauga (Debates), Mataupu i mea o

loo tutupu i nei onapo (contemporary issues) faapea ai foi ma taaloga, i Aso Toonai uma i le itula e 3.00pm. E faatinoina uma ai taaloga a le fanau, e pei o voli polo (volleyball), soccer, touch rugby, faapea foi ma le tennis. Na amata lava polokalame faapitoa o le kuata e ala i aoga tala o le Lotu a Tamaiti. Ma sa faataunuaina i le manuia lea faamoemoe. O le tala o le taeao na faaulutalaina "O Iesu ma le fafine na ulutinoina e temoni lana tama" ae o le tala o le afiafi na faaulutalaina "O le taua o le filifiliga". O nei tala ma lo la faamoemoe ina ia faailoa ai le mana faamalolo o lo tatou Alii Faaola o Iesu Keriso, e mafai ai ona faamalolo mai. Ae e le gata i

fa'aauau itulau 15

mai le itulau 14

lea o le faatauaina o le filifiliga a le tupulaga talavou, aua ua faigata nei aso ona o le tele o faafitauli o loo tulai mai e ono aafia ai filifiliga a le fanau. Na sosoo ai ma le faamavae-ga a le fanau i le Aso Toonai Nov 14th. O lea po na faatinoina ai tauva-ga taleni, o siva. Sa faaiuina i lauga toggi faapea ai foi ma le aiga mamafa i lea afiafi. Na faaiuina polokalame o lenei kuata e ala i le tala o le Kerisimasi sa faapea ona auai atu ai le Autalavou Laiti faatasi ai ma le Aoga Aso Sa. Sa faataunuaina ma le manuia lea foi faamoemoe ona o le alofa ma le agalelei o le Atua. O lea e sii ai le viiga ma le faafetai i le tapaaui sili i le lagi ona o lona alofa ma lona agalelei, ua mafai ona faataunuaina ai ma le manuia fuafuaga o lenei tausaga. E ui lava i le feagai ai o lo tatou atunuu ma faalavelave faalenatura. Ae e lei avea lea ma auala na alofia ai lona alofa ma lona agalelei i lana fanau. Faafetai ai foi le susuga i le Alii Pule ia Otele Perelini e tusa ai foi ma lana taitaiga ae e le



Autalavou Laiti a Malua 2009

gata i lea o le faufautua foi ua avea lea ma fesoasoani i le Autalavou Laiti i ana polokalame fai. Faafetaia foi susuga i faiaoga, ae e le gata i lea o taitai i aoao ma faletua e tusa ai foi ma le latou lagolagosua i le feagai ai ma le faatinoina o polokalame a le Junior Youth. E le faagaloina foi le soosoo tauau mai o matua e auala mai i le faatagaina mai o alo ma fanau ae faapea ai foi ma talosaga molia o lea ua manuia ai fuafuaga o

lenei tausaga. Tau ina ia faamanuia le Atua i lo outou paia ma lo outou mamalu, ona o lo outou sautia ma lo outou laina ona o le taumafaiga o le fanau. E talitonu ua faia lava nei mea uma mo le viiga o le Atua. Ia pulepule tetele le Atua ma ia foai atu le soifua maua ma le lagi e mama, ina ia tatou maua ai se Kerisimasi fiafia ma se Tausaga Fou manuia. Faafetai Risati Noaese.

TAALOGA A FALETUA MALUA

E faatalofa atu i le mamalu ma le paia ua aafia. E avea lenei avanoa e avatu ai sina faamatalaga e tusa ai ma taaloga a Faletua Malua o lenei foi tausaga 2009. E fa au sa vaevaeina i ai Faletua uma e aafia ai ma Faletua o Faiaoga. O le Oketi, Puataunofo, Aute, faapea le Teuila. O nei au e fa e taitai lava e Susuga i Faletua o Faaiuso faapea le vaaiga a Faletua o Faiaoga. O taaloga e faatino lava i Aso Tofi taitasi.



Faletua o Faiaoga Kolisi Faafaifeau i Piula ma Malua

O se tauvaga e tausinio tele i le va o au taitasi, aemaise lava i taaloga volipolo.

O le vaituuaga muamua na sola ai le au Oketi ma le manumalo, ma e faapena foi i le vaituuaga lona lua. Na lalata i ai au a le Puataunofo ma le Aute, ae o le tuufatasiga na manumalo lava le Oketi. O Novema 12, 2009, na faaiuina ai taaloga a Faletua i le laugatogi faapea se fiafia na saunia e Faletua o Faaiuso sa o latou taitaiina taaloga o lenei

tausaga.

O Faletua o Faiaoga o ni tagata talenia tele i mea nei o taaloga. O lenei tausaga sa faataunuui ai se tasi polokalame faamalositi tino e ala i le taaloga tenisi. Na oo ai lava ina faia se mafutaga taalo i le va o Kolisi Faafaifeau o Malua ma Piula i le Apia Park. E tasi le aso o lea fa'amoemoe. E le gata ina faia ai taaloga tenisi ae na maua ai foi mo se mafutaga fiafia

i le va o Faletua o Faiaoga o Kolisi Faafaifeau e lua. O loo i ai le faamoemoe mo le faaauauina i lenei tausaga fou pe a aulia manuia i le alofa ma le agalelei o le Atua.

E avea ai foi lenei itula e momoli atu ai le faafetai tele i le Faletua ia Julie Perelini ma le mamalu i Faletua o Faiaoga faapea foi Faletua uma o Aoao Malua, mo le gasologa o taaloga o lenei tausaga atoa. Ou te manatu o la outou lagolago malosi i a tatou polokalame ua manuia ai taaloga o lenei tausaga 2009.

E avea foi lenei itula e faamalulu atu ai le Komiti pe a fai foi sa i ai se sala i lo tatou va, faamagalo mai. Ae ia manuia tele le alo faiva o Faletua Faaiuso ma o latou aiga mo le faauuga o lenei tausaga 2009. Manuia le Kerisimasi ma le Tausaga Fou i le alofa ma le agalelei o le Atua.

Soifua
Tauvela Sua.

VAEGA O LE PAPOVI

O lo o ua faatu uto nei le saena, ua mua atu, mua mai, ua tini pao ai nei le uto ae tau le ai e pei o le upu i le faiva i vai, aua o lea ua to i tua Apolima ina ua ae manuia le faatautaiga i faiva ma tiute sa feagai ai i lenei tausaga. E ave ai le mua ma le faasao ia Muavao, aua o lana pule faasoifua ua afua ai ona taoto peau laga vale o le vasa, ae tuta ai i fanua le folauga. E viia ai le alofa ma le agalelei o le Atua, aua o la e ou le malosi, o le poto ma le atamai ua mafai ai ona faataunuina galuega ma aoaoga o lenei tausaga 2009.

Ae avea ia lenei avanoa e fai ai lou nei tagata faatauvaa, e saunia se ripoti mo lenei foi vaega taua o le ola aoaoina i totonu o lenei Kolisi. Mai le masina o luni i lenei tausaga, sa faaitiitia ai le

numera o le lafu i le 26, ona sa fuaina nisi o manu aua lava le sailia o seleni mo le Kolisi. E lua manu sa faaaogaina mo le Kolisi ae tasi sa faaaogaina mo taumafataga a le au faigaluega i le taimi o le Mafutaga Faafouina. O le taimi nei toe 23 manu o le lafu o loo i ai.

E momoli tele ai le faafetai i le susuga i le faiaoga ia Vaitusi Nofoaiga ona o lana taitaiga ua mafua ai ona manuia galuega uma a le pa povi. Faamalo foi i susuga i lagolago, Filiilagi, Faafetai, Tupou, Momoe ma Semikueva ona o le lagolago malosi i le faatinoina o galuega. Faafetai tele ia Kamuta (Tausaga 2) ma Siatafu (Tausaga 1) ona o le galulue malosi i le faatinoina o feau ma galuega aua lava le faaleleia o

le pa a le Kolisi.

Avea ia lenei avanoa e momoli ai le faafetai i le susuga i le Alii Pule Otele Perelini ona o lana lagolagosua mai i le faatinoina o nisi manaoga o le pa povi, ina ia lelei ma manuia lona agai i luma. Faafetai foi i le au uso le galulue ma le faamalolosi, ao avea i tatou ma e vaia lenei atinae a le Kolisi. Ia fesoasoani mai le Atua ia tatou fuafuaga uma faaii o lenei tausaga. Ia saunia pea i tatou mo ana feau ma ana galuega, aemaise le toe faaauuina o le taumafai i lenei tausaga.

IA MANUIA TELE LE KERISIMASI MA LE TAUSAGA FOU!!!!

SOIFUA

VAITUU PALALE

TAALOGA A AOAO

E viia pea lo tatou Tapaau i le lagi ona o lana tausiga ma lana leoleoga i lo outou soifua ma so matou ola, ua mafai ai ona tatou aulia mai ma le manuia le faaiuga o lenei kuata faa-le-aoaoga. Ae o sina ripoti lenei i tulaga na oo i ai le polokalame taalo a le mafutaga a Aoao i lenei foi kuata ma le tuufaatasiga i lenei foi tausaga atoa.

Na faaauau mai pea finauga a Black ma White i le kuata muamua i le malae numera tasi i lumafale, mo taaloga soka ma lakapi pai (touch).

E le gata i lea ao le taaloga Kirikiti i le malae numera 2 i tuafale, i le finauga a au e fa, o le Blue, Green, Red ma le Yellow i lalo o le taitaiga a le komiti faafoe o lenei tausaga.

Taitai: Susuga Sui Pule, Rev.Maafala.Lima.

Black: Alo Pita, Masitone Sasagi, Martin Mariota.

White: Asora Faresa, Siaosi Mataia, Anitoni Misa.

Iuga o Taaloga

Maeu le finau o au e lua i le faaauau ai o taaloga o le soka ma le lakapi pai i lenei kuata. Peitai ua matauina le faauau ai pea o le malosi o le au a White, ma i'u ina toe manumalo ai foi White i lenei kuata.

O le aotelega la o taaloga i lenei tausaga i le malae numera tasi ua tulai mai ai ua manumalo le au White, ae tulaga lua ai Black.

O le taamilosaga o le Kirikiti i le kuata lenei na molimauiina ai le malosi o le finau a au e fa. O le au a le Blue na o latou umiaina le talita i le kuata muamua o taaloga. Ina ua toe taliu mai, ona luita loa lea e le au a le Yellow, ma na matauina le finau a au nei e lua, ma iu ai ina manumalo le Yellow. Na umia e Yellow le talita mo le lua vaiaso. Peitai i le aso mulimuli o lenei taamilosaga, na luita ai e le Green le talita. O se taaloga mataina ma finau, peitai na maea le taaloga ina ua maua e Green ai a Yellow, ae lei maea ona tata Green. O le iuga la o taaloga kirikiti o le 2009, ua manumalo ai Green, ma ua umia ai nei e le Green le talita i lenei foi tausaga.

Mafutaga Taalo Afeleti (Athletics)

O le Aso Tofi 12 Novema 2009, na faataunuina ai le aso taalo mulimuli a le mafutaga a aoao. Ma na faia ai taaloga afeleti i lea aso e pei o le; togi pulu mamafa, velo le tao, ma le pulu mafola-fola. Na faatinoina i le va o vasega taitasi. O le tuufaatasiga o togi na tulai mai ai: Year 1 - 15, Year 2 - 14, Year 3 - 18, Year 4 - 25.

Ua sola ai le tausaga faaiuso ma le manumalo o taaloga afeleti o lenei tausaga 2009.

Na tolalauina le faaiuga o taaloga e Anitoni Misa, komiti faafoe o lea aso. Na maea ona saunoa manino lea o le Susuga i le taitai komiti; Susuga i le Sui Pule ia Rev.Maafala Lima, e faafetaia

le mafutaga, ma le aiga faiaoga i lea aso, faatasi ai ma lana saunoaga faafetai mo le mafutaga taalo i le tausaga atoa. Na ia faafetaia le Komiti o taaloga, le laulau o le Kolisi ma le vasega faaiuso, ona o le faatautaiga o taaloga, faatasi ai ma lana faamanuiaga mo le mafutaga a aoao ma le vasega faaiuso 2009, ina ia manuia le alo atu i suega ma le faaiuga o lenei tausaga.

O le ava e tatau ai e fai ai lou leo faatauvaa ma sui o le komiti faafoe, ma le vasega faaiuso, e momoli atu ai le faafetai i le Susuga i le Alii Pule, le Sui Pule ma le aiga faiaoga, aemaise le paia o le mafutaga taalo a aoao 2009. Faafetai i la outou lagolago sua i la matou galuega faa taitai ma laufali o taaloga. O i matou o tagata vaivai ma faatauvaa, peitai na mafaia ona faatino a tatou taaloga ona o lo outou lava papale i so matou faatauvaa.

Faamagalo mai sa matou aga ua sala, poo sa matou tu ua le tau-tamalii i lau silasila. Moomooga o o matou loto, ia tumau pea le mamalu, le filemu ma le fiafia i totonu o le mafutaga taalo a Malua nei ma seia oo i le faavavau.

Ia faamanuia tele le Atua i lau Susuga i le Alii Pule ma le faletua, le Sui Pule, le Aiga Faiaoga ma le Kolisi i Malua. Ia tatou maua faatasi se Kerisimasi manuia ma se Tausaga fou fiafia i le alofa o le Atua.

Tofa,
Anitoni Misa.

Komiti o le Maluapapa

Peniamina Leota, Makesi Neemia, Terry Pouono, Saipele Maiava, Latu Latai, Visiesio Saga, Aigofie Marino, Alesana Pala'amo

Malua Theological College

www.malua.edu.ws

© 2009